

山西通志卷第二百九

山西巡撫都察院右副都御史臣覺羅石麟

旨修輯

藝文二十 書一

漢

報任少卿書

司馬遷

少卿足下曩者辱賜書教以愼于接物推賢進士爲務意氣
勤勤懇懇若望僕不相師而用流俗人之言僕非敢如是也
僕雖罷駑亦嘗側聞長者之遺風矣顧自以爲身殘處穢動
而見尤欲益反損是以獨抑鬱而無誰語諺曰誰爲爲之孰
令聽之蓋鍾子期死伯牙終身不復鼓琴何則士爲知己用
女爲說已容若僕大質已虧缺矣雖材懷隋和行若由夷終

不可以爲榮適足以見笑而自黜耳書辭宜荅會東從上來
又迫賤事相見日淺卒卒無須臾之間得竭志意今少卿抱
不測之罪涉旬月迫季冬僕又薄從上雍恐卒然不可爲諱
是僕終已不得舒憤懣以曉左右則長逝者魂魄私恨無窮
請略陳固陋闕然久不報幸勿爲過僕聞之修身者智之符
也愛施者仁之端也取予者義之表也恥辱者勇之決也立
名者行之極也士有此五者然後可以託于世而列于君子
之林矣故禍莫憯于欲利悲莫痛于傷心行莫醜于辱先而
詬莫大于宮刑刑餘之人無所比數非一世也所從來遠矣
昔衛靈公與雍渠同載孔子適陳商鞅因景監見趙良寒心
同子驂乘袁絲變色自古而恥之夫中材之人事關于宦賢
莫不傷氣而況於忼慨之士乎如今朝廷雖乏人奈何令刀

鋸之餘薦天下之豪雋哉僕願先人緒業得待罪輦轂下二十餘年矣所以自惟上之不能納忠效信有奇策材力之譽自結明主次之又不能拾遺補闕招賢進能顯岩穴之士外之不能備行伍攻城野戰有斬將搃旗之功下之不能積日累勞取尊官厚祿以爲宗族交遊光寵四者無一遂苟合取容無所短長之效可見于此矣鄉者僕亦嘗厠下大夫之列陪奉外廷末議不以此時引綱維盡思慮今已虧形爲掃除之隸在闕茸之中廼欲仰首信眉論列是非不亦輕朝廷羞當世之士邪嗟乎嗟乎如僕尚何言哉尚何言哉且事本末未易明也僕少負不羈之才長無鄉曲之譽主上幸以先人之故使得奏薄技出入周衛之中僕以爲戴盆何以望天故絕賓客之知忘簞家之業日夜思竭其不肖之材力務一心

營職以求親媚于主上而事乃有大謬不然者夫僕與李陵俱居門下素非能相善也趣舍異路未嘗銜杯酒接殷勤之餘歡然僕觀其爲人自奇士事親孝與士信臨財廉取予義分別有讓恭儉下人常思奮不顧身以徇國家之急其素所蓄積也僕以爲有國士之風夫人臣出萬死不顧一生之計赴公家之難斯已奇矣今舉事一不當而全軀保妻子之臣隨而媒孽其短僕誠私心痛之且李陵提步卒不滿五千深踐戎馬之地足歷王庭垂餌虎口橫挑彊胡仰億萬之師與單于連戰十餘日所殺過當虜救死扶傷不給旃裘之君長咸震怖廼悉徵左右賢王舉引弓之民一國共攻而圍之轉鬬千里矢盡道窮救兵不至士卒死傷如積然李陵一呼勞軍士無不起躬自流涕沫血飲泣更張空拳言白刃北首爭

死敵者陵未沒時使有來報漢公卿王侯皆奉觴上壽後
日陵敗書聞主上爲之食不甘味聽朝不怡大臣憂懼不知
所出僕竊不自料其卑賤見主上慘悽怛悼誠欲效其欸欸
之愚以爲李陵素與士大夫絕甘分少能得人之死力雖古
名將不過也身雖陷敗彼觀其意且欲得其當而報漢事已
無可奈何其所摧敗功亦足以暴于天下矣僕懷欲陳之而
未有路適會召問卽以此指推言陵功欲以廣主上之意塞
睚眦之辭未能盡明明主不深曉以爲僕沮貳師而爲李陵
游說遂下于理拳拳之忠終不能自列因爲誣上卒從吏議
家貧財賂不足以自贖交游莫救左右親近不爲一言身非
木石獨與法吏爲伍深幽囹圄之中誰可告愬者此正少卿
所親見僕行事豈不然邪李陵旣生降隤其家聲而僕又俱

以蠶室重爲天下觀笑悲夫悲夫事未易一二爲俗人言也
僕之先人非有剖符丹書之功文史星歷近乎卜祝之間固
主上所戲弄倡優所畜流俗之所輕也假令僕伏法受誅若
九牛亡一毛與螻蟻何異而世又不與能死節者比特以爲
智窮罪極不能自免卒就死耳何也素所樹立使然也人固
有一死死有重于泰山或輕于鴻毛用之所趨異也太上不
辱先其次不辱身其次不辱理色其次不辱辭令其次詘體
受辱其次易服受辱其次關木索被箠楚受辱其次髡毛髮
嬰金鐵受辱其次毀肌膚斷肢體受辱最下腐刑極矣傳曰
刑不上大夫此言士節不可不厲也猛虎處深山百獸震恐
及其在弇檻之中搖尾而求食積威約之漸也故士有畫地
爲牢勢不入削木爲吏議不對定計于鮮也今交手足受木

索暴肌膚受榜箠幽于圜牆之中當此之時見獄吏則頭搶地視徒隸則心惕息何者積威約之勢也及已至此言不辱者所謂彊顏耳曷足貴乎且西伯伯也拘羑里李斯相也具五刑淮陰王也受械于陳彭越張敖南鄉稱孤繫獄抵罪絳侯誅諸呂權傾五伯囚于請室魏其大將也衣赭衣關三木季布爲朱家鉗奴灌夫受辱居室此人皆身至王侯將相聲聞鄰國及罪至罔加不能引決自裁在塵埃之中古今一體安在其不辱也由此言之勇怯勢也強弱形也審矣曷足怪乎且人不能蚤自裁繩墨之外已稍陵夷至于鞭箠之間乃欲引節斯不亦遠乎古人所以重施刑于大夫者殆爲此也夫人情莫不貪生惡死念父母顧妻子至激于義理者不然廼有所不得已也今僕不幸早失父母無兄弟之親獨身孤

立少卿視僕于妻子何如哉且勇者不必死節怯夫慕義何處不勉焉僕雖怯懦欲苟活亦頗識去就之分矣何至自沉溺縲紲之辱哉且夫臧獲婢妾猶能引決況若僕之不得已乎所以隱忍苟活幽糞土之中而不辭者恨私心有所不盡鄙沒世而文采不表於世也古者富貴而名磨滅不可勝記唯倅儻非常之人稱焉蓋西伯拘而演周易仲尼厄而作春秋屈原放逐乃賦離騷左邱失明厥有國語孫子臙脚兵法修列不韋遷蜀世傳呂覽韓非囚秦說難孤憤詩三百篇大抵賢聖發憤之所爲作也此人皆意有所鬱結不得通其道故述往事思來者乃如左邱無目孫子斷足終不可用退論書策以舒其憤思垂空文以自見僕竊不遜近自託于無能之辭網羅天下放失舊聞略考其行事綜其終始稽其成敗

興壞之理凡百三十篇亦欲以究天人之際通古今之變成一家之言草創未就適會此禍惜其不成是以就極刑而無愠色僕誠已著此書藏之名山傳之其人通邑大都則僕償前辱之責雖萬被戮豈有悔哉然此可爲智者道難爲俗人言也且負下未易居下流多謗議僕以口語遇遭此禍重爲鄉黨所戮笑以汙辱先人亦何面目復上父母之邱墓乎雖累百世垢彌甚耳是以腸一日而九迴居則忽忽若有所亡出則不知其所往每念斯恥汗未嘗不發背霑衣也身爲閹閣之臣寧得自引深藏于巖穴耶故且從俗浮沉與時俯仰以通其狂惑今少卿乃敎以推賢進士無迺與僕私心刺謬乎今雖欲自彫琢曼辭以自解無益于俗不信祇足取辱耳要之死日然後是非迺定書不能盡意故略陳固陋

戒段會宗書

谷永

足下以柔遠之令德復興都護之重職甚休甚休若子之才
可優游都城而取卿相何必勒功昆山之灰總領百蠻懷柔
殊俗子之所長愚無以喻雖然朋友以言贈行敢不略意方
今漢德隆盛遠人賓服傳鄭甘陳之功沒齒不可復見願吾
子因循舊貫毋求奇功終更亟還亦足以復鴈門之跡萬里
之外以身爲本願詳思愚言

奏諫膠東王太后數出游獵書

張敞

臣聞秦王好淫聲葉陽后爲不聽鄭衛之樂楚嚴好田獵樊
姬爲不食鳥獸之肉口非惡旨甘耳非憎絲竹也所以抑心
意絕嗜慾者將以率二君而全宗祀也禮君母出門則乘輜
輶下堂則從傅母進退則鳴玉佩內飾則結綢繆此言尊貴

所以自斂制不從恣之義也今太后資質淑美慈愛寬仁諸
侯莫不聞而少以田獵縱欲爲名於以上聞亦未宜也唯觀
覽於往古全行乎來今令后姬得有所法則下臣有所稱誦
臣敞幸甚

說廉丹書

馮衍

衍聞順而成者道之所大也逆而功者權之所貴也是故期
於有成不問所由論於大體不守小節昔逢丑父伏軾而使
其君取飲稱於諸侯鄭祭仲立突而出忽終得復位美於春
秋蓋以死易生以存易亡君子之道也詭於衆意寧國存身
賢智之慮也故易曰窮則變變則通通則久是以自天祐之
吉无不利若夫知其不可而必行之破軍殘衆無補於主身
死之日負義於時智者不爲勇者不行且衍聞之得時無怠

張良以五世相韓椎秦始皇博浪之中勇冠乎賁育名高乎
泰山將軍之先爲漢信臣新室之興英俊不附今海內潰亂
人懷漢德甚於詩人思召公也愛其甘棠而况子孫乎人所
歌舞天必從之方今爲將軍計莫若屯據大郡鎮撫吏士砥
礪其節百里之內牛酒日賜納雄桀之士詢忠智之謀要將
來之心待從橫之變興社稷之利除萬人之害則福祿流於
無窮功烈著於不滅何與軍覆於中原身膏於草野功敗名
喪恥及先祖哉聖人轉禍而爲福智士因敗而爲功願明公
深計而無與俗同

復說廉丹書

蓋聞明者見於無形智者慮於未萌况其昭哲者乎凡患生
於所忽禍發於細微敗不可悔時不可失公孫鞅曰有高人

之行負非於世有獨見之慮見贅於人故信庸庸之論破金石之策襲當世之操失高明之德夫決者智之君也疑者事之役也時不重至公勿再計

說鮑永書

衍聞明君不惡切慤之言以測幽冥之論忠臣不顧爭引之患以達萬機之變是故君臣兩興功名兼立銘勒金石令問不忘今衍幸逢寬明之日將值危言之時豈敢拱默避罪而不竭其誠哉伏念天下離王莽之害久矣始自東郡之師繼以西海之役巴蜀沒於南夷緣邊破於北狄遠征萬里暴兵累年禍拏未解兵連不息皇帝以聖德靈威龍興鳳舉率宛葉之衆將散亂之兵嘔血昆陽長驅武關破百萬之陣摧九虎之軍靄震四海席卷天下攘除禍亂誅滅無道一期之間

海內大定繼高祖之休烈脩文武之絕業社稷復存炎精更
德冠往初功無與二天下自以去亡新就聖漢當蒙其福
而賴其願樹恩布德易以周洽其猶順驚風而飛鴻毛也然
而諸將虜掠逆倫絕理殺人父子妻人婦女燔其室屋略其
財產飢者毛食寒者裸跣冤結失望無所歸命今大將軍以
明淑之德秉大使之權統三軍之政存撫并州之人惠愛之
誠加乎百姓高世之聲聞乎羣士故其延頸企踵而望者非
特一人也且大將軍之事豈得珪璧其行束修其心而已哉
將定國家之大業成天地之元功也昔周宣中興之主齊桓
霸彊之君耳猶有申伯召虎夷吾吉甫攘其蝥賊安其疆宇
况乎萬里之漢明帝復興而大將軍爲之梁棟此誠不可以
忽也且衍聞之兵久則力屈人愁則變生今邯鄲之賊未滅

正定之際復擾而大將所部不過百里守城戰軍不息兵革
雲翔百姓震駭奈何自怠不爲深憂夫并州之地東帶名關
北逼彊胡年穀獨熟人庶多資斯四戰之地攻守之場也如
其不虞何以待之故曰德不素積人不爲用備不豫具難以
應卒◆生人之命縣於將軍所仗必須良才宜改易非任更
選賢能夫十室之邑必有忠信審得其人以承大將軍之明
雖則山澤之人無不感德思樂爲用矣然後簡精銳之卒發
屯守之士三軍旣整甲兵已具相其土地之饒觀其水泉之
利制屯田之術習戰射之教則威風遠暢人安其業矣若鎮
太原撫上黨收百姓之歡心樹名賢之良佐天下無變則足
以顯聲譽一朝有事則可以建大功惟大將軍開日月之明
發深淵之慮監六經之論觀孫吳之策省羣議之是非詳衆

士之白黑以超周南之迹垂甘棠之風令夫功烈施於千載
富貴傳於無窮伊望之策何以加茲

說鄧禹書

衍聞昔者先王學大道以觀於政夫爲君而不明於道上無
所承天下無以化民爲臣而不明於道進無以事君退無以
修身聖朝天然之資將軍純茂之德誠少遊神乎經書之林
馳情乎元妙之中明照於日月而智溢乎四海聖朝享堯舜
之榮將軍荷稷契之烈自然理也

與陰就書

衍聞神龍驤首幽雪景燕明聖修德志士思名是以意同情
合聲比則應也伏見君侯忠孝之性慈仁殷勤論議周密思
慮深遠顧以微賤數蒙聖恩被侯大惠衍年老被病恐一旦